

आकाशवाणी

खास-खास खबरां:-

- प्रधानमंत्री नरेन्द्र मोदी होंरें आखेआ जे जन विश्वास बिल 2026 कन्नै मुखे च गुजर -बसर करने ते कारोबार करने दियें सहूलतें गी बड़ा मता बढ़ावा थहोग।
- मुख् चुनां आयुक्त ज्ञानेश कुमार होंरें नालदा मामलें दी जांच राष्ट्रीय जांच एजेंसी NIA गी सोंपी दिती ऐ।
- भारती नौ-सेना अज्ज विशाखापट्टनम च अत्याधुनिक युद्धा पोत तारागीरी गी अपने बेड़े च शामिल करोग।
- संयुक्त राष्ट्र दे महासचिव एंटोनियो गुतेरेस होंरें पच्छिम एशिया च बने दे तनाजे दा शांतिपूर्ण ढंगे कन्नै नबेड़ा करने दा आहवान कीता ऐ।
- खेलो इंडिया आदिवासी खेड़्दां अज्ज छत्तीसगढ़ च सम्पन्न होई जागंन। कर्नाटक 23एं तगमें कन्नै अंक तालिका च सारें शा उप्पर ऐ।
- ते IPL च जंदी रातीं खेड़्ढे गेदे मैचें च सनराइजर्स हैदराबाद नै कोलकाता नाइट राइडर्स गी हराई दिता। अज्ज चेन्नेई सुपर किंग्स दा मुकाबला पंजाब किंग्स कन्नै होग।

<><><><><><>

PM –Jan Vishwas

प्रधानमंत्री नरेन्द्र मोदी होंरें आखेआ जे जन विश्वास बिल 2026 गी संसद च पारित करने कन्नै मुखे च गुजर-बसर करने ते कारोबार च सहूलतें गी बड़ा मता बढ़ावा थहोग। सोशल मीडिया दी इक पोस्ट च प्रधानमंत्री होंरें आखेआ ऐ जे एह बिल भरोसे आहले ढांचे गी निग्गर बनांदा ऐ- जेहड़ा लोकें गी सशक्त बनाने च मदाद करदा ऐ ते पराने नियमें-कायदें गी हटाने दा कम्म करदा ऐ।

संसद नै जन विश्वास बिल पारित करि दिता ऐ जिसी राज्यसभा ने कल मंजूरी देई दिती ही ते लोकसभा ने इस बिल गी बुधवारें पारित कीता हा। इस बिल दे तैहत लौहके अपराधें गी अपराध दी श्रेणी थमां बाहर कीता जाहग ते जर्मानें ते सजा गी अपराध दे अनुपात च संशोधित करने जनेह उपास लागू कीते जाडन।

<><><><><><>

PM –Denis Manturov Meet

रुस दे पैहले उपप्रधानमंत्री डैनिस मैनटुरोव होरें कल नमीं दिल्ली च प्रधानमंत्री नरेन्द्र मोदी हुंदे कन्ने मुलाकात कीती। मलाटी दौरान श्री मैनटुरोव होरें प्रधानमंत्री होरें गी आपसी साथ-सहयोग आले बक्ख-बक्ख क्षेत्रें च होआ रदी प्रगति बारे दस्सेआ दसाया- जेदे च कारोबार ते आर्थिक सांझ-भ्याली- हैल-सम्पर्क ते लोके-लोके बश्कार सरबंधें जनेह क्षेत्र शामिल न। श्री मोदी होरें 23में भारत-रुस सालाना शिखर सम्मेलन गितै भरु दिसम्बर च रुस दे राष्ट्रपति ब्लादिमीर पुतिन हुंदे कामयाब भारत दौरें गी चेता नुआया। श्री मोदी होरें सालाना शिखर सम्मेलन मगरा दौनें बक्खी दा बक्ख-बक्ख क्षेत्र च कीती गेदी प्रगति उप्पर संदोख जाहिर कीता ते दबक्खी सरबंधें ते सांझ-भ्याली गी होर मजबूत करने बारे गल्ल कीता।

<><><><><><>

CEC Gyanes Kumar Hand

मुख्य चुनां आयुक्त जानेश कुमार होरें मालदा मामलें दी जांच राष्ट्रीय जांच एजेंसी (NIA) गी सौंपी दिती ऐ। NIA दी टीम अज्ज पच्छिम बंगाल पुज्जोग। कल सुप्रीम कोर्ट ने मालदा जिले च SIR अभ्यास कन्ने जुड़े दे सत्त न्यायिक अधिकारियें गी बंधी बनाए जाने दा गंभीर संज्ञान लैता ऐ। अदालत नै इसी निंदनीय दस्सेआ ते राज्य दे गृह सचिव- पुलस महानिदेशक ते होरनें अधिकारियें थमां निश्क्रियता लेई जवाब मंगेआ।

सर्वोच्च न्यायालयन ने चुनां आयोग गी CBI जां NIA आसेआ जांच दा आदेश देने ते न्यायिक अधिकारियें दी सुरक्षा गी यकीनी बनाने दे निर्देश दिते- जेहदे च जरूरत पौने पर केन्द्रीय बलें दी तैनाती बी जरूरी ऐ। एह फैसला सुप्रीम कोर्ट दे निर्देश दे दी पालमा आस्तै लैता गेआ ऐ। ओह 6 अप्रैल गी सुप्रीम कोर्ट गी अपनी पैहली रिपोर्ट सौंपडन।

<><><><><><>

Taragiri

रक्षामंत्री राजनाथ सिंह होर अज्ज विशाखापट्टनम च नौसेना दे डाकयार्ड च अत्याधुनिक युद्ध पोत INS तारागीरि गी भारतीय नौ सेना दे बेड़े च शामिल करने सरबंधी समारोह च शामिल होगंन। तारागीरि दे नौसेना दे शामिल होने कन्नै भारत दे पूर्वी समुन्द्रै च निगरानी ते राक्खी-हिफाजत गी बड़ा मता बल थोग। एदे कन्नै भारतीय नौ-सेना दी युद्ध समर्थ दी तयारियें ते आत्मनिर्भर भारत दे मकसद गी होर मजबूती मिली ऐ। राजनाथ सिंह होर एदे इलावा रक्षा शोध कन्नै सरबंधत होरनें कार्यक्रमें च बी शामिल होगंन। उत्थे नौ-सेना सुविधाएं दा जायजा लैगंन ते Naval Science & Technological लैब्रोरैट्रियें दा जायजा लैगंन।

<><><><><><>

UN Chief –West Asia

संयुक्त राष्ट्र दे महासचिव एंटोनियो गुतरेस होरें पच्छिम एशिया च बने दे तनाजे दा शांतिपूर्ण ढंगे कन्नै नबेड़ा करने दा आहवान कीता ऐ। उनें आखेआ जे हून समा आई गेदा ऐ जे अमरीका ते इजरायल- ईरान कन्नै अपने युद्ध गी समाप्त करन- जेदे कारण बड़ा मता मनुक्खी ते आर्थिक नुकसान होआ करदा ऐ। उनें ईरान गी बी अपने गोआंडियें मुल्खें पर हमलें रोकने लेई आखेआ। इक ट्वीट च उनें आखेआ जे तनाजे उस्सलै खत्म होई जंदे न जिस्सलै लीडर जंग दी थाहर गल्लबात दा रस्ता इख्तेयार करदे न।

न्यूयार्क च सुरक्षा कौंसल दे बाहर पत्रकारें कन्नै गल्ल करदे होई श्री गुतरेस होरें आखेआ जे लड़ाई दे जारी रौहने कारण मनुक्खी ते आर्थिक नुकसान हर रोज लगातार बद्दा रदा ऐ। पच्छिम एशिया च बने दे तनाजे गी इक म्हीने थमां बद्द होई जाने पर गुतरेस होरें तनाजे दा हल शांतिपूर्ण ढंग्गें ते कूटनीति राए तुप्पने उप्पर जोर पाया।

<><><><><><>

Khelo India Tribal Games

छत्तीसगढ़ च आयोजित खेलो इंडिया आदिवासी खेड्ड दा अज्ज समापन होआ रदा ऐ। समापन समारोह अज्ज संजा रायपुर च होग- जेहदे च मुखमंत्री विष्णु देव साय मुख परौहने दे तौरा पर शिरकत करगंन। इस मौके पर अंतराष्ट्रीय मुक्केबाज मैरी कॉम ते फुटबाल दे खडारी Bhaichung Bhutia बी मुख परौहने दे तौरा पर मौजूद होडन। इस प्रतियोगिता दे तैहत मर्दे दे फुटबॉल दा फाइनल अज्ज छत्तीसगढ़ ते बंगाल बश्कार खेड्डेया जाहग। पदक तालिका च कर्नाटक 23 सुन्ने दे तगमे हासल करियै पैहली थाहरा पर ऐ- ओहदे बाद ओडिशा 20 सुन्ने दे तगमे कन्नै दुए थाहरा पर ऐ ते झारखंड 12 सुन्ने दे तगमे हासल करियै- त्रीये थाहरा पर ऐ। 25 मार्च गी छत्तीसगढ़ च शुरु होए दे खेलो इंडिया ट्राइबल खेड्डें च 30 राज्यें ते केन्द्र शासित प्रदेशें थमां 3 जहार थमां बद्ध खडदारियें हिस्सा लैता।

<><><><><><>

Train

उत्तरी रेलवे दे जम्मू डिवजन नै नर्मी दिल्ली च श्री माता वैष्णो देवी कटरा रेलवे स्टेशन बश्कार चलने आहली विशेष ट्रेनें दी 40 बादद्व यात्राएं दी घोषणा कीती ऐ। जम्मू दे सीनियर डीविजनल कमर्शियल मैनेजर उचित सिंघल होरें गलाया जे ट्रेनें दी पिछली यात्राएं च 100 प्रतिशत सीटें दी उपलब्धता गी दिक्खदे होई 15 शा 16 अप्रैल तगर लेई एह फैसला कीता गेआ।

उ'नें दस्सेआ जे ट्रेन नम्बर 04081 नमीं दिल्ली शा रातीं 11 बजियै 45 मिनटें उप्पर चलोग ते अगले दिन दपैहरी 12 बजे श्री माता वैष्णो देवी कटरा पुजोग। इयां गै ट्रेन नम्बर 04082 श्री माता वैष्णो देवी कटरा थमां रातीं 9 बजे चलोग ते अगले दिन बड्डलै 9 बजे दिल्ली पुज्जोग।

<><><><><><>

IPL

इंडियन प्रीमियर लीग IPL क्रिकेट च सनराइजर्स हैदराबाद नै कल रातीं कोलकाता नाइट राइडर्स गी इंडन गार्डन च 65 रन्जे कन्नै हराई दिता। 227 रन्जे दे लक्ष्य दा पिच्छा करदे होई कोलकाता नाइट राइडर्स 16 ओवरें च 161 रन्जे पर ऑल आउट होई।

एहदे थमां पैहले बल्लेबाजी करदे होई हैदराबाद ने 20 ओवरें च 8 विकटां मुहाइयै 226 रन्ज बनाए। हैदराबाद आस्तै हैनारिक कलेसन ने 35 बॉलें च 52 रन्ज बनाए ते जिसले के कोलकाता आस्तै अंगरिश रघुवंशी ने 29 बालें च 52 रन्जे दा योगदान दिता। कोलकाता नाइट राइडर्स ने 24 बालें च 39 रन्ज बनाए ते 2 विकटां हासल कीतियां ते एहदे कन्नै गै नितिश गी मैन ऑफ दा मैच चुनेया गया। अज्ज चेन्नेई सुपर किंग्स दा मकाबला पंजाब किंग्स कन्नै एम.ए. चिंदम्बरम स्टेडियम चेन्नेई च शामी 7.30 बजे होग।

<><><><><><>